

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 100820 24 K  
Visoko, 04.09.2024. godine

## U IME FEDERACIJE BOSNE I HERCEGOVINE

Općinski sud u Visokom, sudija Avdija Avdić, uz sudjelovanje zapisničara Sejdić Džemile, u krivičnom predmetu protiv optuženog A.K. sina I. iz V., zbog krivičnog djela nasilje u porodici iz člana 222. stav 1. KZ F BiH, rješavajući po optužnici Kantonalnog tužilaštva-tužiteljstva Zeničko-Dobojskog kantona broj: T04 0 KT 0055596 23 od 29.11.2023. godine, nakon održanog javnog i usmenog glavnog pretresa, u prisustvu Kantonalnog tužitelja Andreje Božičković i optuženog A.K. u nastavku glavnog pretresa, dana 04.09.2024. godine, donio je i javno objavio

## P R E S U D U

OPTUŽENI: A.K., sin I. i majke N. rođene K., rođen ... godine u S., nastanjen u mjestu K. broj ..., općina V., pismen, sa završenom SSS, po zanimanju elektromehaničar, neoženjen, nezaposlen, po narodnosti Bošnjak, državljanin BiH, lošeg imovnog stanja, JMB: ...,

## KRIV JE

što je,

Dana 13.10.2023. godine, oko 13,30 sati, na području grada V., u mjestu K., u šumi zvanoj „L.“, nakon što ga je majka N.K. zatekla sa motornom pilom kako siječe šumu, drskim i bezobzirnim ponašanjem ugrozio mir i psihičko zdravlje svoje majke, na način da je istu omalovažavao i upućivao prijetnje i psovke, govoreći joj: „Šta si došla, jebem ti mater, ja imam pravo da siječem i moja je šuma ko i tvoja, kurvo“, pri tome joj psujući majku i oca, da će je iseliti iz kuće i otjerati bratu u G., pa iako je znao i bio svjestan da takvim postupanjem može ugroziti mir, psihičko i fizičko zdravlje člana svoje porodice što je i htio, pa tako i zamahnuo šakom da je udari, gdje se N.K. izmakla, ali je uspio da joj zakači lijevu ruku, nakon čega je sjela na livadu jer joj je potekla krv iz nosa, a A.K. joj potom prišao i zaprijetio da ne smije događaj prijaviti policiji, inače će vidjeti šta će joj biti,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje člana svoje porodice sa kojim živi u zajedničkom domaćinstvu,

čime je počinio krivično djelo Nasilje u porodici iz člana 222. stav 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

## USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 3(tri)mjeseca , a koja se neće izvršiti ako optuženi za vrijeme od 1(jedne)godine ne počini novo krivično djelo.

Na osnovu člana 212. stav 3. ZKP FBiH oštećena N.K. se sa imovinsko pravnim zahtjevom upućuje na parnični postupak.

Na osnovu čl.202 stav 4 ZKP FBiH optuženi se oslobađa plaćanja troškova krivičnog postupka i isti padaju na teret budžetskih sredstava suda.

### Obrazloženje

Kantonalno tužilaštvo-tužiteljstvo Zeničko-Dobojskog kantona (u daljem tekstu KT ZDK) optužnicom broj T04 0 KT 0055596 23od 29.11.2023. godine podiglo je optužnicu protiv A.K. zbog krivičnog djela nasilje u porodici iz člana 222. stav 1. KZ F BiH (u daljem tekstu KZ FBiH).

Optužnica je potvrđena od strane sudije za prethodno saslušanje ovog suda dana: 04.12.2023. godine. Dana 08.04.2024. godine na ročištu o izjašnjenju o krivnji, optuženi je izjavio da nije kriv za krivično djelo koje mu se stavlja na teret.

Na glavnom pretresu dana 04.09.2024. godine, optuženi A.K. priznao je krivnju za krivično djelo nasilje u porodici iz člana 222. stav 1. KZ F BiH, a njegovo priznanje je u saglasnosti sa dokazima u koje je sud izvršio uvid i to: zapisnik o saslušanju svjedoka-oštećene N.K. PS Visoko broj: 08-02-09/1-970/23 od 13.10.2023. godine, zapisnik o saslušanju svjedoka N.K. KT ZDK od 24.11.2023. godine, Standardizirani policijski izvještaj PS Visoko broj: F04-10-23-2675 od 13.10.2023. godine sa alkotestom za osumnjičenog A.K.; Rješenje Općinskog suda u Visokom broj: 41 0 Pr 099463 23 Zm od 14.10.2023. godine; Specijalistički nalaz JU Dom zdravlja Visoko na ime N.K. od 13.10.2023. godine i Izvod iz kaznene evidencije MUP Sarajevo 02/5-2-03-8-2-4176 od 13.11.2023.godine.

Obrana nije imala dokaznih prijedloga.

Sud je priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u cijelosti u saglasnosti sa materijalnim dokazima, naprijed navedenim, u koje je sud izvršio uvid, a koji dokazi po svom vjerodostojnom značaju potvrđuju priznanje optuženog, na osnovu čega van svake sumnje proističe da je optuženi ostvario sva bitna obilježja bića krivičnog djela nasilje u porodici iz člana 222. stav 1. KZ F BiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predocnim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela djela nasilje u porodici iz člana 222. stav 1. KZ F BiH.

Odlučujući o vrsti sankcije za optuženog sud je od olakšavajućih okolnosti cijenio da je optuženi priznao izvršenje krivičnog djela u cijelosti i time doprinio rasvjetljavanju utvrđenog činjeničnog stanja, da se smatra neosuđivanim, zdravstveno stanje optuženog, te da se kaje za učinjeno krivično djelo da su se odnosi popravili sa majkom kao i činjenicu da se nalazi u Centru za odvikavanje od uživanja opojnih sredstava i biti će još naredne dvije godine.

Cijeneći olakšavajuće okolnosti i nepostojanje otežavajućih okolnosti na strani optuženog, sud je optuženom za krivično djelo nasilje u porodici iz člana 222. stav 1. KZ FBiH izrekao uslovnu osudu, kojom se optuženom za počinjeno krivično djelo utvrđuje kazna zatvora u trajanju od 3 (tri) mjeseca, a koja se neće izvršiti ako optuženi za vrijeme od 1 /jedne/ godine, od dana pravosnažnosti presude, ne počini novo krivično djelo, jer sud cijeni da će se ovakvom kaznom ostvariti svrha kažnjavanja predviđena članom 42. KZ FBiH (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), te postići potpuna kako posebna tako i generalna prevencija.

Na osnovu čl.202 stav 4 ZKP FBiH sud je optuženog oslobodio plaćanja troškova krivičnog postupka i isti padaju na teret budžetskih sredstava suda.

Na osnovu člana 212. stav 3. ZKP FBiH sud je oštećenu N.K. sa imovinsko pravnim zahtjevom uputio na parnični postupak.

Sudija  
Avdija Avdić

**PRAVNA POUKA:**

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.